

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होरें कल नमीं दिल्ली च प्रगति मंच दी 50मीं बैठक दी प्रधानता करदे होई 5 महत्वपूर्ण ढांचागत परियोजनाएं दी समीक्षा कीती।
2. पच्छिम बंगाल दे मुख्ख चुनांs आयुक्त ते मुख्ख चुनां अधिकारी दे खलाफ SIR प्रक्रिया दे सरबंधै च दर्ज कीती गेदियें दंऊ पुलस शकैतें पर चुनांs आयोग नै सख्त ऐतराज जताया ऐ।
3. केन्द्र सरकार नै इस बरे पैहली फरवरी थमां तम्बाकू उत्पादें पर बादू उत्पाद शुल्क ते पान मसालें पर नमां उप-कर लाने दी अधिसूचना जारी करी दिती ऐ।
4. बदेश मंत्री डाक्टर एस. जयशंकर होरें आखेया ऐ जे बांगलादेश दियें साबका प्रधानमंत्री खालिदा ज़िया हुंदी दूरदर्शिता ते आदर्श दौनें मुख्खे बशकार सांझ-भ्याली दे विकास लेई बत पदरी करगंन।
5. मुख्ख भरै च नमें बरे दा जशन- राष्ट्रपति द्रौपदी मुरमू ते प्रधानमंत्री नरेन्द्र मोदी होरें देशवासियें गी नमें बरे दियां शुभकामनां दितियां न।
6. 44मीं राष्ट्री जूनियर खो-खो चैम्पियनशिप कल्लै थमां बैंगलुरु च शुरु।

PM Pragati

प्रधानमंत्री नरेन्द्र मोदी होंरें कल नमीं दिल्ली च सूचना ते संचार प्रोद्योगिकी आधारित बहु-आयामी मंच प्रगति दी 50मीं बैठक दी प्रधानता कीती। बैठक दे दरान श्री मोदी होंरें सिडक- रेलवे- बिजली- जल-संसाधन ते कोहले सनें बक्ख- बक्ख खेतरें दिये 5 महत्वपूर्ण ढांचागत परियोजनाएं दी समीक्षा कीती। एह प्रोजैक्ट 5 राज्ये कन्ने जुड़े दे न ते इंदी कुल लागत 40 जहार करोड़ रुपें शा मती ऐ। प्रधानमंत्री होंरें आखेया जे पिच्छले इक दहाके च प्रगति मंच दे नेतृत्व आले मंच नै 85 लक्ख करोड़ रुपें शा मते दिये परियोजनाएं गी रफतार देने च मदाद कीती ऐ। प्रधानमंत्री होंरें राज्ये गी- मुख्ख सचिवे दे स्तर उप्पर बशेश रुप कन्ने समाजी खेतर लेई प्रगति मंच जनेही बवस्थाएं गी संस्थागत रुप देने गितै प्रोत्साहित कीता। उनें सब्बनें मुख्ख सचिवे गी “पी.एम. श्रम योजना” दी बरीकी कन्ने निगरानी करने लेई आखेया।

<><><><><><>

Year Ender Reform

कल खत्म होए दे बरे 2025 गी भारत च राष्ट्रीय सुरक्षा गी लेइयै फैसलाकुन ते निग्गर रीं अपनाने दे बरे दे रुपे च चेता रखेया जाहग। प्रधानमंत्री नरेन्द्र मोदी हुंदे नेतृत्व च देश ते देशवासिये दी सलामती ते सुरक्षा गी सब्बनें शा मती तरजीह दिती गेदी ऐ ते भारतवासिये पर कुसै बी हमले पर हून पैहले आंगर संयम बरतने आहला रीं कदे नैई अपनाया जाहग। सगुआं ऐसी स्थिति च भारत हून तौले तुरत ते तगड़ेयाई कन्ने परता दिता ऐ। प्रधानमंत्री नरेन्द्र मोदी होंरें

आतंकवाद गी लेइयै भारत दे इस रमै गी फाइव-न्यू नार्मल यानी उनें 5 नियमें च शाल कीता ऐ जेहड़े भारत दे सामान्य स्वभाव दा हिस्सा बनी गेदे न। इनें सिद्धांते च पैहला कुसै बी आतंकी हमले दा पूरी तगड़ेयाई कन्नै परता देना-दूआ परमाणु ताकत दा रौब दस्सियै दिती जाने आहली कुसै धमकी गी बरदाशत नैई करना- यानि कुसै परमाणु ताकत मुख्य च बी- भारत आतंकी ठकाने पर हमला करने शा पिच्छे नैई रौहग।

<><><><><><>

WB -CEO

पच्छम बंगाल दे मुख चुनांस आयुक्त ते मुख निर्वाचन अधिकारी दे खलाफ SIR प्रक्रिया दे सरबंधें च दर्ज कीती गेदियें दा पुलस शकैतें पर चुनांस आयोग नै कड़ी आपत्ति जताई ऐ। मुख निर्वाचन आयुक्त कार्यालय ने इक ब्यान च आरोपें गी निराधार दस्सदे होई खारज करी दिता ते आखेया जे एह शकैतां SIR 2026 आस्तै कनूनी कर्तव्यें दा पालन करा रदे अधिकारियें गी डराने लेई जानी बूझियै कीता गेदा कम्म ऐ। आयोग नै आखेया जे डराने-धमकाने दी रणनीति बाहरी दबास दे जरिये चुनावी प्रक्रिया च रुकावट पैदा करने लेई बनाई गई ऐ। चुनांस आयोग नै आखेया जे एह प्रयास कदें बी सफल नैई होगंन। आयोग नै अपने इक ब्यान च आखेया जे इनें शकैतें दे पिच्छे दी साजिश दा पर्दाफाश करने लेई हर संभव कोशश कीती जाग।

<><><><><><>

Govt. Tobacco

सरकारै इस बरे पैहली फरवरी थमां तम्बाकू उत्पादें पर बादू उत्पाद शुल्क लाने ते पान-मसालें पर नमां उप-कर लाने दी अधिसूचना जारी करी दिती ऐ। तम्बाकू ते पान-मसालें पर एह नमें शुल्क- वस्तु ते सेवा कर जी.एस.टी दे इलावा होगंन। पैहली फरवरी थमां पान मसाला- सिगरेट- तम्बाकू ते इस किस्मै दे उत्पादें पर 40 फीसद ते बीड़ी पर 18 फीसद जी.एस.टी लग्गा करोग।

<><><><><><>

Jaishankar

बदेश मंत्री सुब्रह्मण्यम जयशंकर होरें बांगला देश दियें साबका प्रधानमंत्री खालिदा ज़िया हुंदे खीरी संस्कार च भारत दा प्रतिनिधित्व कीता ते बांगलादेश Nationalist Party –BNP दे नेता तारिक रहमान होरें गी प्रधानमंत्री नरेन्द्र मोदी हुंदा सोगी स्नेहा दिता। रहमान हुंदे कन्नै मलाटी दरान डाक्टर जयशंकर होरें विश्वास जताया जे खालिदा ज़िया हुंदी दूरदर्शिता ते आदर्श-दौनें मुखें बश्कार सांझ-भ्याली दे विकास लेई बत पदरी करगंन। खालिदा ज़िया हुंदा जंदे मंगलवारें लम्मी बमारी दे मगरा काल होई गया हा। श्री मोदी होरें चिट्ठी च जून 2015 च ढाका दी अपनी यात्रा दे दरान खालिदा ज़िया हुंदे नै होई दी मलाटी ते गल्लबात गी चेता कीता ते आखेया जे ओह पक्के धेइये आली इक मजबूत नेता हियां।

<><><><><><>

New Year Welcome

मुख्य भरै च नमें बरे दा जशन बड़े उत्साह कन्नै मनाया गया। देश भर च शांति बवस्था बनाए रखने आस्तै सुरक्षा एजेंसियां सर्तक रेहियां। पूरे देश च लोकें सार्वजनिक समारोहें ते कार्यक्रमें च बड़े जोश कन्नै 2026 दा सुआगत कीता। राश्ट्री राजधानी दे कर्नाट प्लेस ते इंडिया गेट जनेह प्रमुख थाहरें पर नमें बरे दे समारोह आयोजन कीते गो। बड़ी मती धुंध होने दे बावजूद बी लोकें दी भीड़ इनें आयोजनें च दिखने गी लब्बी। गोआ च मकामी लोकें ते पर्यटकें उत्सव आहली थाहरें पर किट्ठे होइयै नमें बरे दा जशन मनाया ते कन्नै शानदार आतशबाजियां कीतियां। होटलें ते समुन्द्रे दे कंडे विशेष कार्यक्रमें दा आयोजन कीता गया। मुम्बई च लोकें छत्रपति शिवाजी महाराज टर्मिनल सनें केई प्रमुख थाहरें पर 2026 दा गर्मजोशी कन्नै सुआगत कीता। हिमाचल प्रदेश दे धर्मशाला थाहर बी नमें बरे दा जशन मनाया गया। जिसलै के जम्मू-कश्मीर दे सोनामर्ग च सैलानियें बर्फ दे बिच्च नमें बरे दा जशन मनाया। मध्य-प्रदेश दे ग्वालियर च बी लोकें आतशबाजी ते बॉलीवुड संगीत उप्पर डॉस करियै 2026 दा जशन मनाया। तेलंगाना दे हैदराबाद च बी लोकें नमें बरे दे उत्सवें च संगीत उप्पर नच्चियै ते आतिशबाजी करियै जशम मनाया। दुई बक्खी कर्नाटक दे बेंगलुरु च बी नमें बरे 2026 दा सुआगत बड़े उत्साह कन्नै मनाया गया। अमृतसर च रातीं 12 बजदे ही शरधालुएं दी भीड़ श्री हरमंदिर साहिब च मत्था टेकने आस्तै उमड़ी पेई।

<><><><><><>

Prez PM Greet

राश्ट्रपति द्रौपदी मुरमू ते प्रधानमंत्री नरेन्द्र मोदी होरें देशवासियें गी नमें बरे दियां शुभकामनां दितियां न। अपने स्नेह च राश्ट्रपति होरें आखेया ऐ जे नमां बरा सब्बनें लेई शांति- सुख ते समृद्धि लेइयै औग। प्रधानमंत्री होरें इस मौके पर समाज च शांति ते सुख दी कामना कीती। उनें मेद बुज्झी ऐ जे एह बरा सब्बनें लेई खरी सेहत ते समृद्धि लेइयै आवै।

<><><><><><>

New Year Greetings

उपराज्यपाल मनोज सिन्हा- मुखमंत्री उमर अब्दुल्ला- उपमुखमंत्री सुरिंदर चौधरी ते मंत्री स्कीना इत्तू ते सतीश शर्मा होरें जम्मू-कश्मीर दे लोके गी नमें बरे दियां मुबारकां दितियां न। उप-राज्यपाल मनोज सिन्हा होरें अपने इक संदेश च जम्मू-कश्मीर दे सारे बसनीकें गी नमें बरे दी शुभकामनां ते मबारकबाद दिती ऐ। उनें आखेया जे नमां बरा सारे दे जीवन च नमें मौके ते नमीं मेद लेई आए। मुखमंत्री उमर अब्दुल्ला होरें बी जम्मू-कश्मीर दे लोके गी नमें बरे दियां मबारकां दितियां न ते इस बेर च शांति समृद्धि ते नरोई सेहत दी कामना कीती ऐ। उपमुखमंत्री सुरिंदर चौधरी- मंत्री स्कीना इत्तू ते सतीश शर्मा होरें बी सारे गी नमें बरे दी मबारकबाद दिती ते सुख- शांति दी कामना कीती।

<><><><><><>

Pilgrims Rush SMVD

2025 बरे दे अखीरले ध्याडे कल श्री माता वैशणो देवी तीर्थ स्थान पर श्रद्धालुएं दा बड़ा भारी रश दिक्खेआ गया जेहड़ा अज्ज बी जारी ऐ। मुख्य भरै थमां जहारां बद्दे श्रद्धालु नमें बरे दे मौके पर माता रानी दा शीरवाद हासल करने लेई उत्थे पुज्जे दे न। प्रशासन नै यात्रा रस्ते ते भवन पर बी सुरक्षा ते यात्रिं दी बवस्थित आओजाई यकीनी बनाने आस्तै सब्बै लोइचदे बंदोबस्त यकीनी बनाए दे न। सभनें महत्वपूर्ण थाहें पर सुरक्षाबलें, मेडिकल टीमें ते भीड़ दे प्रबंधन आहले अमले दी तैनाती कीती गेदी ऐ। एहदे अलावा पुलस ते सिविल प्रशासन दे वरिष्ठ अधिकारी पिच्छले किश दिन थमां गै सी.सी.टी.वी कैमरें दे राएं हालात दी लगातार निगरानी करा करदे न। भारी रश दे बावजूद श्री माता वैशणो देवी जी दी जातरा बवस्थित ढंगै सिर जारी ऐ। अजें कि कल रातीं मता रश होई जाने पर यात्रा गी किश चिरै लेई रोकना बी पेया हा ते पर्जी काउंटर बी बंद करने पे हे। खीरी जानकारी थहोने तगर यात्रा पूरी चाल्ली रमानदारी ते बवस्था आहले ढंगै सिर चलै करदी ही।

<><><><><><>

Search Operation Udh

उधमपुर दे उच्चे पहाड़ी त जंगली इलाकें च छप्पे दे त्रै पाकिस्तानी आतंकवादियें दे सफाए लेई सुरक्षाबलें आसेया बड्डे स्तरे पर चलाया गेदा तपाशी अभियान पिच्छले 15एं दिनें थमां जारी ऐ। उधमपुर दे एस.एस.पी. अमोद अशोक नागपुरे होरें दस्सेया जे जम्मू-कश्मीर पुलस- फौज ते CRPF दियां सांझियां टीमां बड़े

मते कठन इलाके ते सख्त मौसमी हालात दे बावजूद एकडे उच्चे- पहाड़ी ते जंगली इलाके च लगातार अपना अभियान चला करदियां न।

<><><><><><>

Kho-Kho

44मीं राष्ट्री जूनियर खो-खो चैम्पियनशिप कलै थमां बेंगलुरु च शुरु होई गेदी ऐ। प्रतियोगिता च मुख्य भरै थमां लगभग इक जहार नौजवान जागत ते कुड़ियां बक्ख-बक्ख श्रेणियें च अपना दम-खम दस्सगंन।

<><><><><><>

IMD Weather

मौसम विभाग नै दिल्ली- हरियाणा- चंडीगढ़- पूर्वी उत्तर-प्रदेश- ओडिशा- पंजाब ते पच्छमी राजस्थान च बड़ी कोला बड़ी मती धुंध पौने दा ऑरेंज अलर्ट जारी कीता ऐ। एदे इलावा विभाग ने बिहार- पूर्वी राजस्थान- हिमाचल प्रदेश- जम्मू- कश्मीर-लद्दाख ते झारखंड सने उत्तराखंड- पच्छिम बंगाल- सिक्किम- पच्छमी उत्तर-प्रदेश ते पूर्वोत्तर भारत च बी घनी धुंध पौने दे असर जताए न। मौसम विभाग नै अंडमान ते निकोबार टापुएं पर गरज-चमक कन्नै बरखा बरने ते अंधी झक्खड़ चलने दी भविक्खवाणी बी कीती ऐ। तोंआई दिल्ली- एन.सी.आर दे इलाके च ब्हाऊ दी गुणवत्ता बड़ी खराब श्रेणी च बनी दी ऐ। केन्द्री प्रदूषण नियंत्रण बोर्ड मूजब- जंदी रातीं राष्ट्री राजधानी च ब्हाऊ दी गुणवत्ता सरबंधी सूचकांक 388 दर्ज कीता गया।

<><><><><><>